

Na osnovu člana 42. Zakona o državljanstvu Federacije Bosne i Hercegovine ("Službene novine Federacije BiH", broj 43/01), federalni ministar unutrašnjih poslova, donosi

# **UPUTSTVO**

## **O NAČINU VOĐENJA POSTUPKA STICANJA I PRESTANKA DRŽAVLJANSTVA FEDERACIJE BOSNE I HERCEGOVINE I VOĐENJU EVIDENCIJA TOG DRŽAVLJANSTVA**

**(Objavljeno u "Sl. novine FBiH", br. 8 od 28 februara 2002, 58/10)**

### **I - OPĆE ODREDBE**

1.  
Ovim uputstvom utvrđuje se način vođenja postupka sticanja i prestanka državljanstva Federacije Bosne i Hercegovine (u daljem tekstu: državljanstvo Federacije), kao i način vođenja evidencija tog državljanstva.

2.  
U postupku sticanja i prestanka državljanstva Federacije mora se postupati na način i pod uslovima koji su utvrđeni u Zakonu o državljanstvu Bosne i Hercegovine ("Službeni glasnik BiH", broj 13/99, 41/02, 6/03, 14/03, 82/05 i 43/09), Zakonom o državljanstvu Federacije Bosne i Hercegovine ("Službene novine Federacije BiH", broj 43/01, 22/09 i 61/09 - u daljem tekstu: Zakon) i ovim uputstvom.

### **II - PODNOŠENJE ZAHTJEVA ZA STICANJE ODNOSNO PRESTANAK DRŽAVLJANSTVA FEDERACIJE**

3.  
Zahtjev za sticanje državljanstva Federacije na osnovu čl. 5., 6. i 7. Zakona, podnosi se nadležnom organu koji vodi matične knjige (u daljem tekstu: matični ured) prema mjestu rođenja djeteta. Ako je dijete rođeno u inostranstvu upis se vrši prema odredbama Zakona o matičnim knjigama ("Službeni list RBiH", broj 20/92) i Uputstva o vođenju matičnih knjiga ("Službeni list RBiH", broj 21/93).

4.  
Uz zahtjev za sticanje državljanstva Federacije iz tačke 3. ovog uputstva, podnosilac zahtjeva (u daljem tekstu: stranka) dužan je priložiti: obrazac prijave za upis u matičnu knjigu rođenih koji se dobija u matičnom uredu, dokaz o državljanstvu roditelja djeteta u vrijeme rođenja djeteta; uvjerenje-potvrda da lice nije upisano u evidencijama državljana po mjestu prebivališta roditelja i po mjestu rođenja oca; ovjerenu fotokopiju lične karte i uvjerenje o prebivalištu izdato od nadležne policijske uprave, a za djecu iz člana 6. stav 2. Zakona prilaže se i saglasnost roditelja za sticanje državljanstva. O sticanju državljanstva Federacije iz tačke 3. ovog uputstva, ne donosi se posebno rješenje, već se

vrši upis u matične knjige rođenih na osnovu podataka koji se utvrde prema stavu 1. ove tačke. Ako se utvrdi da nisu ispunjeni uslovi za upis u matičnu knjigu rođenih, u tom slučaju donosi se rješenje kojim se zahtjev za upis odbija.

Protiv rješenja iz stava 3. ove tačke može se izjaviti žalba Federalnom ministarstvu unutrašnjih poslova-Federalnom ministarstvu unutarnjih poslova (u daljem tekstu: Federalno ministarstvo) u roku od 15 dana od dana prijema rješenja. Rješenje doneseno po žalbi je konačno i protiv njega se može pokrenuti upravni spor kod Vrhovnog suda Federacije Bosne i Hercegovine.

5.

Zahtjev za sticanje državljanstva Federacije na osnovu čl. 8., 9., 10., 11. i 12. i zahtjev za prestanak državljanstva Federacije na osnovu člana 14. tačka 3. Zakona, podnosi se policijskoj upravi prema mjestu stalnog boravišta stranke.

Ako stranka živi u inostranstvu zahtjev za sticanje odnosno prestanak državljanstva Federacije podnosi se na način utvrđen u stavu 3. člana 29. Zakona.

Zahtjev iz stava 1. ove tačke podnosi se na obrascu broj 1.

6.

Uz zahtjev za sticanje državljanstva Federacije na osnovu člana 8. Zakona (sticanje državljanstva naturalizacijom) stranka je dužna priložiti: izvod iz matične knjige rođenih; uvjerenje izdato od strane kantonalnog organa uprave nadležnog za unutrašnje poslove (u daljem tekstu: kantonalni organ) da ima prijavljen stalni boravak na teritoriji Bosne i Hercegovine najmanje osam godina prije podnošenja zahtjeva od čega najmanje posljednje dvije godine na teritoriji Federacije; izjavu ovjerenu od strane nadležne opštinske službe za upravu da poznaje jedan od službenih jezika Federacije; uvjerenje da nije izrečena mjera sigurnosti protjerivanja stranca iz Bosne i Hercegovine odnosno Federacije ili disciplinska mjera udaljenja stranaca sa teritorije Bosne i Hercegovine odnosno Federacije izdata od strane Ministarstva za ljudska prava i izbjeglice Bosne i Hercegovine; uvjerenje da se ne vodi krivični postupak; izjavu o odricanju od ranijeg državljanstva nakon sticanja državljanstva Bosne i Hercegovine i Federacije i dokaz o uplaćenju federalnoj administrativnoj taksi.

Dokaz iz člana 8. tačka 5. Zakona, kantonalni organ je dužan pribaviti po službenoj dužnosti.

Izjava o odricanju od ranijeg državljanstva podnosi se na obrascu broj 2.

7.

Uz zahtjev za sticanje državljanstva Federacije na osnovu člana 9. (sticanje državljanstva olakšanom naturalizacijom) stranka je dužna priložiti: izvod iz matične knjige rođenih i vjenčanih; izjavu o odricanju od ranijeg državljanstva; uvjerenje od kantonalnog organa da ima stalni boravak u trajanju od najmanje tri godine na teritoriji Bosne i Hercegovine, uključujući posljednju godinu na teritoriji Federacije i dokaz o uplaćenju federalnoj administrativnoj taksi.

8.

Uz zahtjev za sticanje državljanstva Federacije na osnovu člana 10. Zakona stranka je dužna priložiti: dokaz o državljanstvu Federacije jednog od roditelja djeteta, uvjerenje o stalnom boravku djeteta odnosno roditelja djeteta i izvod iz matične knjige rođenih djeteta.

8a.

Uz zahtjev za sticanje i promjenu državljanstva Federacije iz člana 27.a stav 1. Zakona stranka je dužna priložiti: uvjerenje o državljanstvu Bosne i Hercegovine, uvjerenje o entitetskom državljanstvu, ovjerenu kopiju važeće putne isprave Bosne i Hercegovine, ovjerenu kopiju važeće lične karte, izvod iz matične knjige rođenih, izvod iz matične knjige vjenčanih (za lica koja su u braku), potvrdu o prebivalištu u Brčko Distriktu Bosne i Hercegovine (u daljnjem tekstu: Brčko Distrikt) i dokaz o uplaćenju federalnoj administrativnoj taksi.

Zahtjev iz stava 1. ove tačke podnosi se na obrascu broj 1a. (nalazi se u prilogu ovoga uputstva).

9.

Uz zahtjev za sticanje državljanstva Federacije na osnovu člana 40. stav 3. Zakona, stranka je dužna priložiti: uvjerenje od kantonalnog organa o stalnom nastanjenju na teritoriji Federacije (u periodu između 6. aprila 1992. godine i 1. januara 1998. godine) i da ima neprekidno prebivalište (boravak) u trajanju od dvije godine počev od 1. januara 1998. godine; izvod iz matične knjige rođenih; izvod iz matične knjige vjenčanih ili dokaz o slobodnom bračnom stanju; izjavu o odricanju od ranijeg državljanstva nakon sticanja državljanstva Federacije; dokaz o državljanstvu ranije države; uvjerenje da nije upisan u evidencijama državljanstva za područja onih općina gdje je imao boravak na teritoriji Bosne i Hercegovine do podnošenja zahtjeva i dokaz o uplaćenju federalnoj administrativnoj taksi.

10.

Uz zahtjev za sticanje državljanstva Federacije na osnovu člana 40. stav 4. Zakona, stranka je dužna priložiti: uvjerenje od kantonalnog organa o stalnom nastanjenju na teritoriji Federacije (u periodu od

1. januara 1998. godine do 31. decembra 1998. godine) i da ima neprekidno prebivalište (boravak) u trajanju od tri godine; izvod iz matične knjige rođenih; izvod iz matične knjige vjenčanih ili dokaz o slobodnom bračnom stanju; izjavu o odricanju od ranijeg državljanstva nakon sticanja državljanstva Federacije; dokaz o državljanstvu ranije države; uvjerenje da nije upisan u evidencijama državljana za područja onih općina gdje je imao boravak do podnošenja zahtjeva i dokaz o uplaćenju federalnoj administrativnoj taksi.

11.

Uz zahtjev za sticanje odnosno prestanak državljanstva Federacije stranka je dužna podnijeti originalnu dokumentaciju ili ovjerene prijepise.

Dokumentacija iz stava 1. ove tačke, ne može biti starija od šest mjeseci.

12.

Policajska uprava je dužna preduzeti sve mjere da stranka priloži svu potrebnu dokumentaciju predviđenu ovim uputstvom zavisno od toga o kojem se zahtjevu radi i nakon toga zahtjev sa dokumentacijom odmah dostaviti kantonalnom organu.

Ukoliko kantonalni organ utvrdi da je priložena dokumentacija nepotpuna zatražit će od policijske uprave da pribavi tu dokumentaciju i istu dostavi u roku koji mu odredi taj organ.

Kada kantonalni organ utvrdi da je stranka uz zahtjev priložila svu potrebnu dokumentaciju, dužan je postupiti u skladu sa odredbama stava 2. člana 29. Zakona.

13.

Ako Federalno ministarstvo utvrdi da stranka uz zahtjev nije priložila svu potrebnu dokumentaciju pismenim putem će zatražiti da kantonalni organ pribavi potrebnu dokumentaciju u određenom roku i istu dostavi Federalnom ministarstvu.

### **III - POSTUPAK RJEŠAVANJA DRŽAVLJANSTVA FEDERACIJE**

14.

Rješenje o sticanju državljanstva Federacije na osnovu čl. 8., 9., 11. i 12. Zakona, odnosno rješenje o prestanku državljanstva Federacije po osnovu čl. 21. i 22. Zakona u skladu sa odredbama člana 28. stav 3. Zakona donosi Federalno ministarstvo i nakon toga postupa na način predviđen u članu 33. Zakona.

Federalno ministarstvo rješenje iz stava 1. ove tačke dostavlja Ministarstvu civilnih poslova Bosne i Hercegovine putem interne dostavne knjige.

Kada Federalno ministarstvo primi obavještenje od Ministarstva civilnih poslova Bosne i Hercegovine da je doneseno rješenje ispravno, na to rješenje stavlja klauzulu o danu stupanja na snagu tog rješenja.

Nakon stupanja na snagu rješenja iz stava 3. ove tačke Federalno ministarstvo rješenje dostavlja stranci i matičnom uredu prema mjestu posljednjeg prebivališta (boravišta) stranke radi upisa u matičnu knjigu rođenih, Federalnom ministarstvu za pitanja boraca i invalida odbrambeno-oslobodilačkog rata - Federalnom ministarstvu za pitanja branitelja i invalida domovinskog rata, kantonalnom organu i Ministarstvu civilnih poslova Bosne i Hercegovine.

Klauzula o danu stupanja na snagu rješenja utvrđena je na obrascu broj 3.

15.

Rješenje o prijemu u državljanstvo Federacije na osnovu člana 40. st. 3. i 4. Zakona, donosi Federalno ministarstvo. U tom rješenju navodi se konstatacija o prijemu u državljanstvo Federacije i odobrenje da se može izvršiti upis u matičnu knjigu rođenih.

Rješenje iz stava 1. ove tačke, i podtačke o bračnom stanju osobe koja je primljena u državljanstvo Federacije, dostavlja se matičnom uredu radi upisa u matičnu knjigu rođenih.

16.

Rješenje o sticanju državljanstva Federacije na osnovu člana 10. Zakona donosi policijska uprava prema mjestu boravka djeteta, a za Brčko Distrikt rješenje donosi Odjeljenje-Odjel za javni registar Vlade Brčko Distrikta.

Rješenje iz stava 1. ovog člana dostavlja se Ministarstvu civilnih poslova Bosne i Hercegovine radi utvrđivanja jesu li ispunjeni uslovi za sticanje državljanstva Federacije po osnovu člana 10. Zakona. Protiv tog rješenja može se izjaviti žalba Federalnom ministarstvu u roku od 15 dana od dana prijema

rješenja. Rješenje doneseno po žalbi je konačno i protiv njega se može pokrenuti upravni spor pred Vrhovnim sudom Federacije Bosne i Hercegovine.

## **IV - EVIDENCIJE DRŽAVLJANSTVA FEDERACIJE**

17.

Državljanstvo Federacije upisuje se u sljedeće knjige:

- matičnu knjigu rođenih u skladu sa članom 30. Zakona;
- knjigu evidencije o sticanju državljanstva Federacije.

Uz knjigu evidencija iz stava 1. alineja 2. ove tačke vodi se imenični registar.

Sadržaj knjiga iz alineje 2. stava 1. ove tačke kao i sadržaj imeničnog registra utvrđeni su na obrascima 4, i 6.

Knjige evidencije i imenični registar vode se u obliku knjige koja je tvrdo ukoričena. Na vanjskoj strani prve korice mora biti naljepnica sa ispisanim nazivom knjige odnosno registra i oznakom vremenskog perioda za koji se ta knjiga odnosno registar vodi. Ako se vodi za više godina na naljepnici će se napisati sve te godine.

18.

U skladu sa članom 31. Zakona, evidencija iz alineje 2. i 3. stava 1. tačke 17. ovog uputstva vodi Federalno ministarstvo s tim što će se ta evidencija voditi i putem automatske obrade podataka.

## **V - PRELAZNE I ZAVRŠNE ODREDBE**

19.

Obrasci broj 1, 1a, 2, 3, 4, i 6. odštampani su uz ovo uputstvo i čine njegov sastavni dio.

20. Danom stupanja na snagu ovog uputstva prestaje primjena svih podzakonskih propisa koji su regulisali način vođenja evidencija o državljanstvu na teritoriji Federacije do dana stupanja na snagu ovog uputstva.

21. Ovo uputstvo stupa na snagu narednog dana od dana objavljivanja u "Službenim novinama Federacije BiH".

Broj 02/1-02-1-118/01

12. februara/veljače 2002. godine Sarajevo

Ministar dr. Ramo Masleša, s. r.